



SPRACHWELTEN

In tip gnervus

El strapatscha mia gnerva ed era quella dals vischins. Tgi che pertgira in chaun sto avair gnerva da fier. Jau stoss ex-num organisar ina tabletta u in auter med per calmar il chaun, cunquai che jau passent cun el il prim d'avust a Cuir. Tals ed auters pensiers hai jau fatg, cura che jau hai dà pled da pertgiral il «Schlunggi», ma tut è vegnì auter.

Ina da mias incumbensas impurtantas da questa stad è stà da guardar dal chaun durant diesch dis. Gia il cumià dal patrun al ha fatg fadia. Sch'in chaun savess bragir, engirass jau ch'il Schlunggi avess spundì grossas larmas. Per protestar ha el mors a l'urset, in da mes regals, en il nas fin che quel è sa schlià. Las meglras delicatessas ha Schlunggi ignorà e l'oss dal «Fressnapf» ha el sutterrà ladinamain. El è sa tschentà, n'ha betg urlà, ha passentà senza reclamar insaquantas uras en la pensiun d'animals ed ha strusch fatg mucs durant il fieu artificial dal prim d'avust. Durant sias vacanzas en citad ha il «Jack Russel» mussà sia segunda fatscha. «Ina planta veglia na pon ins betg transplantar» – quest proverbì è vegnì endament a mai, cura ch'il Schlunggi giascheva mo pli enturn. Dapi che jau hai fatg questa experientscha sun jau anc pli conscianta ch'ils animals, ussa specificamain il Schlunggi, han in'olma – e quella è en ses cas restada a Sedrun. Noss cumià è lura però era stà per omaduas varts fitg emoziunal. Malgrà ch'el è sa legrà immens, cura che ses patrun, mes bab, è arrivà, hai jau gi il sentiment ch'el endiria en il medem mument pervia da nossa separaziun. Jau lasch encrescher per il «terrier», il pli sensibel chaun che jau enconusch. Il diari cun fotografias e text dals diesch dis da vacanzas cun Schlunggi hai jau deditgà al bab – forse era sco regurdanza per mai.

Sibylle Pfiffner